

四庫全書

史部

欽定四庫全書

史部

續資治通鑑長編卷六十九

七十一

詳校官檢討臣劉錫五

刑部郎中臣許兆椿覆勘

纂修官編修臣楊壽楠

謄錄貢生臣苗序瀛

欽定四庫全書

續資治通鑑長編卷六十九

宋 李燾 撰

真宗

大中祥符元年五月辛酉王欽若等言轉運使盧瑛邵
暉祇奉祀事欲留前轉運使張知白權本司常務詔知
白俟禮畢赴闕

壬戌令官吏犯贓遇赦者奏裁或有希望恩宥故干科

條所在禁錮以俟進止 王欽若言泰山下醴泉出

河北轉運使李士衡奏罷內帑所助錢八萬緡於是又請輦本路金帛芻粟四十九萬赴京東以助祀事上曰士衡臨事有心力可獎也遂賜褒詔丁謂因請留士衡於澶州管勾東封事詔從之 有司詳定儀注請于泰

山上置園臺徑五丈高九尺四出陞上飾以青四面如方色壇外一壝廣一丈圍以青繩三周燎壇在園壇東南高一丈二尺方一丈開上南出戶方六尺山下封祀

壇四成十二陛如郊祀錄圜丘之制上飾以元四面如
方色設三壝燎壇如山上社首壇八角三成八陛三壝
如方丘之制又為瘞培於壬地外壝之內天地玉牒玉
冊並刻字填金聯以金塗銀繩緘以玉匱置石礮中配
坐玉冊緘以金匱牒廣五寸冊廣一寸二分厚三分金
匱之制並長一尺三寸檢長如匱厚二寸濶五寸當纏
繩處刻為五道封匱以金泥和金粉乳香為之印以受
命寶寶方一寸二分文曰恭膺天命之寶封匱當寶處

刻深二分石碱之制用石再累各方五尺厚一尺鑿中
廣深令容玉匱傍施檢處皆刻深七寸濶一尺南北各
三東西各二去隅皆七寸纏繩皆刻三道廣一寸五分
深三分又為石檢以揪碱皆長三尺濶一尺厚七寸刻
三道廣深如纏其當封處刻深二寸取足容寶又皆為
小石蓋與封刻相應其檢立碱旁當刻處又為金繩三
以纏碱皆五周徑三分封碱以石泥石末和方色土為
之印以天下同文寶寶鑄以金制同御前寶距石十二

分距四隅皆濶二尺厚一尺長一丈斜刻其道與碱相
應皆再累又為五色土圜封碱上徑一丈二尺下徑三
丈九尺其二寶分寸並以今尺為準金匱回日奉置太
廟本室詔皆從之

乙丑王欽若言錫山蒼龍見

丙寅命王旦馮拯趙安仁等分撰玉牒玉冊文上諭之
曰其文當首叙上天降鑒符瑞沓委次述為民祈福之
意詔緣封禪所經諸州權增屯兵可第賜緡錢及酒

令長吏犒設

戊辰新及第授官人無得以富家權錢倍出息利至任所償還所在察舉之 初有司請依唐故事皇帝告廟出京泰山社首山並用法駕上以前詔惟祀事豐潔餘從簡約於是改用小駕儀仗尋改小駕名曰鑿駕

辛未趙安仁奏得太僕寺狀金玉輅合先赴泰山輅高二丈三尺濶一丈三尺所經州縣城門橋道有隘狹處請令修拆上曰若此則勞人矣可于城外過有墳墓處

避之

癸酉秦國賢肅長公主薨

王承衍先卒
於咸平元年

甲戌上以東封路供頓芻糧數廣召丁謂出扈駕兵籍示之曰蓋有司不知此數廣為營備爾曾不慮煩擾於下其少數未曾轉送者竝秋成和市

丙子詔收瘞汴蔡廣濟河流尸暴骸仍致祭 三司假內藏庫銀十萬兩從之

丁丑給復州經寇盜戶三年 令諸州所貢方物並取

十月以前集泰山下

庚辰詔諸路今年夏秋賦止於本州軍輸納 有司請
登封日園臺立黃麾仗至山下壇設燿火將行禮然炬
相屬又出漆牌遣執仗者傳付山下牌至公卿就位皇
帝就望燎位山上傳呼萬歲下即舉燎皇帝還大次解
嚴又傳呼而下祀官始退其社首瘞坎亦設燿火三為
準從之始定公卿就位亦重傳呼為節上以接神務在
嚴靜遂更為漆牌禮畢仍聽傳呼又恐傳付漆牌不即

遠辰刻或差先遣司天以漏壺設山之上下及以日晷覆校復以壇側擊版相應又自太平頂天門黃峴嶺岱嶽觀各以長竿揭籠燈下照叅候使不愆其節云 贈元德皇太后父故乾元防禦使李英檢校太尉安國節度使追封常山郡王母王氏魏國太夫人仍遣使告元德皇太后廟

辛巳對王旦等於龍圖閣出封禪壇圖示之上曰郊禋日祀昊天上帝位不以正坐蓋合祭皇地祇今封祀日

昊天上帝坐宜當子位天書置於東側太祖太宗位比郊禋日次西北側向以巾祖宗恭事上穹之意

壬午詔天書出京至嶽下日用道門威儀百人在路三十人舊制郊祀正坐褥皆以黃皇帝拜褥以緋至是詔配坐以緋拜褥以紫 詔緣路行宮止以舊屋就加塗堅不須別創 詔於泰山要路置門非執事赴役者無得升

有司言天書出京日創新几褥置五輅中備儀仗導從

七百五十人前後部鼓吹中使二員夾侍仍命官充使

癸未以王旦為天書儀仗使

按宋史作儀衛使

王欽若趙安仁

副之丁謂為扶侍使藍繼宗為扶侍都監入內高品周

懷政入內高班內品皇甫繼明並為夾侍

王欽若趙安仁為副使寔

錄在九月丙子今從本志并書之

詔車駕離京至封禪以前不舉樂

經歷州縣勿以聲伎來迎 甘州輝和爾汗王伊嚕格勒遣

使來告捷使還賜伊嚕格勒香藥金帶弓劍又賞巴烏公主

黃金噐公主即伊嚕格勒之母每事咨而後行故加賜焉 中

使自兗州至言泰山素多虎自興功以來雖屢見未嘗
傷人悉相率入徂徠山衆皆異之詔王欽若就嶽祠祭
謝仍禁其傷捕上謂王旦等曰自醴泉發朕即周問泰
山祠宇有言王母池因念詔許東封以來凡有靈迹靡
不醮告獨此尚闕乃命中使齋青詞致告未發而王欽
若奏至言池水變紫色驗之乃遣使之信宿也旦等曰
休應響答如是之速實至誠所感也

甲申上出御筆所記事示輔臣曰宮禁之內人數非多

然幽閉可念昨令擇一百二十人厚資遣之此亦節度之一端也朕方敦尚清靜以治天下符大中之訓焉

丙戌上御崇政殿親慮御史臺三司開封府殿前侍衛司繫囚流已下遞減一等笞杖釋之 京東轉運使言修葺行宮合用筒瓦望自京運送上曰前詔行宮無得廣有營造今方盛暑自京送瓦重有勞擾非朕意即令以常瓦給用

戊子下詔教節儉戒奢侈有司除袞冕儀仗法服及宴

會所設依舊外自今宮禁皇親臣僚應進奉物勿以銷
金文繡為飾或須創造必候進止諸司無得起樣進呈
仍錄詔賜皇親家一本

六月壬辰詳定所上封禪儀注上覽之曰此儀久廢非
典禮具備豈為盡美即手札疑互凡十九事令五使參
議釐正而行之又以靈山清潔命祀官差減其數或令
蕪攝有暮喪未滿餘服未卒哭者不得預祭內侍諸司
官除掌事宿衛外從升者才二十四人諸司執掌九十

三人以香藥庫副使安守忠領叙州刺史供奉官閤門
祇候黎守忠為內殿崇班充職守忠等掌推貨務三司
言其歲課比舊增八百四萬九千餘緡遂賞之

黎守忠
未見

徙環慶路騎兵于近地省饋運之煩也又以上軍代
所屯威武而下諸軍先是崇儀使胡致恭言是路駐泊
軍皆非精銳望易以近上禁軍上以為芻粟既少屯上
軍則所費滋廣遂詔鈴轄司規度以上軍一人代下軍
二人及是奏至請如詔旨賜輔臣新鑄御書祥符元

寶錢 環慶民飢發廩粟賤糶以濟之

甲午詔有司加謚太祖太宗俟封禪禮畢日恭上冊寶
謚議令王旦撰旦言唐故事丞郎或太常為之上曰尊
奉祖宗豈拘常例特命輔臣以申朕之孝思也 詔泰

山前代封禪基址摧圯者修完之初太平興國中得唐
明皇社首玉冊蒼璧至是令瘞於舊所 命都官員外
郎孫奭至契丹境上告以將有事于泰山時議東封六
師必須從行恐契丹不察妄生猜慮欲遣使諭意上曰

朝廷每遣使往彼有接伴館設之勞但令爽於境上以書信達之可也既而契丹報云中國自行大禮何煩告諭其禮物慮違誓文不敢輒受上曰異域常能固守信誓良可嘉也慶州言築耳朶城畢上曰此城無屯兵止令蕃落自守亦足為近塞之扞蔽也

乙未詔軍校老疾當隸外州者聽從其便 有司言皇帝告廟准典禮出乘玉輅歸乘金輅緣奉安天書於玉輅皇帝赴太廟往來並乘金輅從之 殿中侍御史趙

湘言漢章帝以月令冬至之後有順陽助生之文而無
鞠獄斷刑之政遂定令毋以十一月十二月報囚今季冬
誕聖之月而決大辟不廢願詔有司自仲冬留大辟弗
決俟孟春臨軒閱視情可矜察者貸之他論如法上曰
此固善矣然慮繫囚益淹久吏或旁緣為姦爾

丙申有司請前祀七日遣官以牲幣分祭天齊淵等八
神又祀云云亭亭肅然徂徠會稽五山及於泰山下擇
地望祭前代封禪帝王前祀一日以太牢祀泰山少牢

祀社首並從之

丁酉詔宮殿苑囿下至皇親臣庶第宅勿以五彩為飾
禁用羅製幡勝縑帛為假花者 詔如聞宿州臨渙縣
民託稱神異營建寺宇遠近奔集頗為惑衆宜禁止之
先是五月丙子上復夢向者神人言來月上旬復當賜
天書於泰山即密諭王欽若奏六月甲午木工董祚於
醴泉亭北見黃素曳草上有字不能識言於皇城使王
居正居正見其上有御名馳告欽若欽若等就取得之

遂建道場明日跪授中使捧詣闕奏至上亟召王旦等
諭其事欲自出奉迎即命旦為導衛使己亥旦與扶侍
使而下具儀仗奉迎天書入含芳園之西門庚子羣臣
詣園迎導升殿辛丑上致齋壬寅備鑿駕以出北面拜
殿下導衛扶侍使自殿上奉天書置上前上再拜授陳
克叟跪讀其文曰汝崇孝奉吾育民廣福賜爾嘉瑞黎
庶咸知祕守斯言善解吾意國祚延永壽厯遐歲讀訖
召百官示之復奉以升殿酌獻畢上先還旦等導衛扶

侍至朝元殿上迎拜入內時久雨頓晴景色澄廓苑中
有雲五色讀天書次黃氣如鳳駐殿上

癸卯擢董祚為八作副都頭王居正為右班殿直

甲辰詔兗州大辟囚送鄰州處斷

庚戌曲赦兗州繫囚流罪以下 賜文武百官泰山醴

泉

辛亥詔如聞遣使外州祠祭而禮科素無定數或州縣
因緣須索頗致煩擾其令有司具數行下 開封府言

尉氏縣惠民河決遣使督視完塞

壬子取封禪之義改郊祀樂曲名俟禮畢仍舊其後祀汾陰后土亦如之 判太常禮院孫奭言按禮文饗太廟終獻降階之後武舞上太祝徹豆豐安之樂作一成止然後禮安之樂作是謂送神論語曰三家者以雍徹又周禮樂師職曰及徹帥學士而歌徹鄭元曰謂歌雍也郊祀錄載登歌徹豆一章奏無射羽然則宗廟之樂禮有登歌徹豆一章今於終獻降階之後即作禮安之

樂誠恐闕失望依舊例增用詔判太常寺李宗諤與檢
討詳議以聞宗諤等言國初撰樂章有徹豆豐安曲辭

樂署因循不作望如奭所奏從之

此事寔錄不載會要
載於十一月前六月

後本志亦與改封禪樂曲
名同時載之今附於此

先是諸路貢新茶者凡三

十餘州越數千里有歲中再三至者上憫其勞擾於是

詔悉停罷

丙辰廢內園司從謝德權之請也

丁巳羣臣五上表加尊號曰崇文廣武儀天尊道寶應

章感聖明仁孝從之

御輦院請別製升泰山天平輦

上慮其太重而勞人俾裁減之所司言登陟峻嶮恐不
堅固上曰路稍艱朕當降輦步進又令別造寶匣寶蓋
咸差小其制

秋七月庚申有司言南郊惟昊天皇帝祇配帝日月五
方神州各用幣一十二段其內中外官嶽鎮海瀆以六
十四段分充而不別設按開寶通禮稱內中外官嶽鎮
海瀆幣各從方色即明皆有制幣今請封祀壇內官至

外官三百一十八位社首壇嶽鎮以下一十八位並用
方色幣又南郊牲惟正坐用犢五方帝日月神州共用

羊豕二十二其從祀七百三十二位

按宋史作七百三十七位

仍以

前數分充今請神州而上十二位並用犢其舊供羊豕
改充從祀牲又景德中升天皇極北在第一等今請亦

於從祀牲內體薦

按原本脫去又景德中至從祀牲二十字又體薦訛作薦體今据宋史禮

志補

正 奏可

廣州言大食國舶主陀婆黎願以方物赴

泰山修貢詔許之

初朝陵歲緣路民庶貢物者詔有司給賜頗為稽滯壬戌命右正言知制誥周起供奉官閤門祗候侍其旭專領其事封禪用玉牒冊凡七文思玉工言用玉追琢難成宰相請代以珉石及階州採進上曰此碲碲之類目之為玉以奉天於禮可乎即遣中使徧詢玉工有趙榮者言太平興國中令與衆工治美玉為牒冊歲餘方就真崇政殿庫亟取而用之上曰此蓋先帝聖謨已成垂裕冲眇也仍出示輔臣時王旦宿齋中書即遣中使

諭焉

丙寅免濮州和市茜草仍詔三司諸州市上供物非土地所宜者罷之

己巳命祕書丞直史館劉錯攝將作監與內侍張承素領徒封圜臺石礧太常博士直集賢院宋臯與內侍郝昭信封社首石礧並先規度錯臯請對便殿以礧式進御上起更袍而視之錯蟠子承素崇貴子也

郝昭信未見

辛未濮州舉人郭垂等四百六十二人以車駕東巡獻

菽粟二千石草四萬圍上曰意雖可嘉然納之則諸州
盡以為貢益成煩擾耳令優給其直仍諭京東諸州民
無復然

乙亥詔美人劉氏父故虎捷都指揮使嘉州刺史通贈
潁州防禦使母龐氏追封京兆郡君才人楊氏父故崇
儀使知儼贈單州團練使母張氏追封清河縣君

正史
章惠

楊皇后傳祖瑄父知儼皆
不仕此云崇儀使當考

丁丑三佛齋國王遣使來進貢

乙酉王欽若言修園臺燎臺除道累石功畢自興役至是未嘗見螻蟻等物請致祭嶽祠從之

是月襄許荆南夔歸峽等州米斛錢三百麥斗錢十二
八月己丑朔王旦上太祖尊謚曰啟運立極英武聖文
神德元功大孝皇帝太宗曰至仁應道神功聖德文武
大明廣孝皇帝 詔諸壇祭器並從上設下無令執事
者踐履不恭 有司言比來車駕行幸百司各稱隨駕
按儀制令諸赴車駕所曰詣行在所蔡邕獨斷云天子

以四海為家故謂所居為行在所自今凡有巡幸望云
行在某司從之 審官院言考較京朝官功過舊有日
限今東封在近請權罷上以羣官有自遠而至者慮成
淹滯令至九月乃停

庚寅詔東封路軍馬無得下道蹂踐禾稼違者罪其將
領 王欽若等言泰山日生靈芝軍民競采以獻望量
給錢帛從之

上聞開封府界發民治道辛卯詔亟罷之

有司言九宮貴神在本壇則為大祠於郊祭則位坐不全不應設玉景德初少府監誤以玉九段置圜丘從祀之位今請撤去不用上以封祀壇從祀雖有太一攝提軒轅招搖咸池天一等位然頗疑神名或殊壬辰詔別築九宮壇於行宮之東以封祀日祭享 詔升山有大石難越者築土平之或委曲而過樹當道者用綵帛縈其支幹咸無傷動輝和伊嚕格勒又言趙德明來侵率衆拒戰德明屢敗乘勝追之越黃河

癸巳詔封祀日文宣王四十六世孫同學究出身聖佑
令衣綠次京官陪位初帝謂王旦等曰封祀日聖佑可
使陪位否旦曰聖佑止賜出身未霑命服難列班序故
特命焉 有司言西漢祭天於甘泉秦時祭地於汾陰
后土後漢始定南北郊然則今之汾陰后土本漢祀地
祇之所也將來既禪社首祀皇地祇則后土不當同日
更祭又按唐開元十二年二十年祀皇土於汾陰雒上
十三年封禪不別祀后土欲望車駕出京自遣官就汾

陰告祭封禪日更不致祭從之乃命給事中馮起祭告
甲午知樞密院事陳堯叟落起復 詔京城寺院禁道

俗袒裼踞肆僧尼謹潔修焚

丙申以三司戶部判官殿中侍御史王好古監潤州商
稅工部員外郎直集賢院劉隲監漣水軍商稅太常丞
判三司催欠憑由司王曙監廬州鹽務著作郎直史館
通判兗州李迪監海州商稅先是好古等解送國子監
秋賦舉人有初場十不者准法當停官會赦故薄責之

自是諸州率以為例

王好古劉
臨未見

內侍鄧文慶監泰山

道場於制置使席上言詞輕率詔特勒停

御輦院上

新造輦凡減去七百餘斤詔自今常用之又言輿輦座
褥未奉詔旨前以金繡為飾者欲且仍舊俟故暗改造
即以素羅代之

已亥詔扈從羣臣諸班軍諸色人裝錢比巡幸加等給
賜

庚子置河東緣邊安撫司令河北安撫副使都監一員

掌其事 以車駕巡幸京東西陝西淮南諸州地當

衝要者權增屯兵命諸司使已下為駐泊都監 又以

內殿崇班劉文質為齊州駐泊都監兼都巡檢以泰山
北面有路抵齊州故增警備也 殿中侍御史趙湘言

含芳園迎天書日街中布土為馳道欄以橫木恐人踐
履而羣臣往來前驅者輒去其橫木於馳道上行馬又
每逢輅馬不止傳呼分路而過皆非人臣之禮今若全
依古制不絕馳道恐京師浩穰阻滯車馬欲請自今遇

大禮布土馳道羣臣不得於其上行馬導駕者不在此
限及羣臣每逢閱習輅馬不得衝過許兩面行馬違者
御史臺糾舉詔從之

辛丑詔審刑院開封府自九月一日後勿奏大辟案止
令中書擬定施行 高州言占牘商賈三人為交州所
逐迷道至州境欲配隸本州上曰遠方之民窮而來歸
可給時服緡錢遣人伴送至境放還本國

甲辰詔福建山路險惡其輦官物軍士自今遇旬休節

序特給假 詳定儀注官晁迥而下習泰山園臺封祀
儀於都亭驛

乙巳令天下禁屠宰一月自十月始 翰林侍講學士
邢昺等上景德朝陵地里記六十卷詔褒之

丙午王欽若等言上山道路祀壇御幄咸已畢工上謂
輔臣曰每有自泰山使至者朕必首詢役作勞苦皆言
景色異常衆共樂成其事王旦等因稱頌聖德上曰茲
乃上天敷佑祖宗積累所致也朕何足以當之 詳定

儀注官再習儀於都亭驛

丁未詔陞兩省侍郎在左右常侍之上合班次六尚書
從中書門下之請也始兩省侍郎自唐至德以來皆宰
臣兼領未嘗與庶僚序位晉天福七年始用刑部侍郎
竇貞固為中書侍郎遂班常侍之下由是相因不改今
乃釐正之 黔州言溪洞磨嵯洛浦蠻首領龔行滿等
率族二千三百人歸順是族自唐以來未嘗嚮化也
已酉王欽若來朝獻芝草八千一百三十九本

庚戌王欽若言臣自至嶽下嘗夢神人以增築廟亭為請再夢如初仍指其方位以識之近因督役至威雄將軍祠瞻其神像廟地悉與夢合今請以羨財於廟築亭從之 刑部尚書知陝州寇準表請從祀詔可

辛亥詔文武官疾老年幼者並留京師

癸丑河東轉運司言偵得契丹點集兵馬邊民頗懼望增屯兵上曰近北面亦言戎人聞國家東封調發輦運慮因行討伐率衆堅壁以打圍為名巡邏境上且朝廷

自與之修好固無釁隙若聞其疑擾即驟益防兵彼必
愈致猜慮乃詔邊臣率如常制無得生事

欽定四庫全書

續資治通鑑長編卷七十

宋 李燾 撰

真宗

大中祥符元年九月己未詔告太廟日芝草嘉禾瑞木
列於天書輦前及陳於六室仍各標所貢之處

庚申命兵部侍郎向敏中權東京留守即赴內殿起居
上以敏中舊德有人望故自西京召而用之 詔軍頭

司引見罪人悉具犯由奏聞送開封府決遣俟東封回
日如舊 詔京城緣街官渠民汲水課自今蠲之 皇
城使劉承珪詣崇政殿上新製天書法物有鶴十四來
翔天書扶侍使丁謂奏雙鶴度天書輦飛舞良久翌日
上顧謂曰昨所覩鶴但於轎車上飛度若云飛舞良久文則
文矣恐不為實卿當易此奏也謂再拜曰陛下以至誠
奉天以不欺臨物正此數字所繫尤深皇帝徽猷莫大
於此望付中書載於時政記上俛然許之

按實錄云劉承珪上法物

有鶴十四飛舞於庭本志云有鶴十四至殿上宛轉飛舞正與御座相直封禪記亦同據丁謂所奏止有雙鶴爾豈至殿上者凡十四而飛度天書輦者特其十四之二耶本記并承珪上法物皆不書乃於告廟日書有鶴十四來翔按實錄止云告廟有鶴隨步輦至萬歲殿不言其數本志云還至乾元門有八鶴盤飛空中又曰四鶴飛隨步輦天書初出及還皆有雙鶴翔輦上下疑本紀所稱即通此數也然則上法物及告廟皆有十四鶴來翔矣今兩存之具載上語使後世有考焉

泰山玉女池在太平頂泉源素壅而濁初營頓置山下醴泉發池水亦漲及工徒升山其流自廣清泚可鑑味甚甘美衆賴以濟王欽若請浚治之池側有石像頗摧

折詔劉承珪易以玉石既成上與輔臣臨觀辛酉遣使
礮石為龕奉置舊所令欽若致祭

壬戌免夔州地基錢 禮儀使言准典禮皇帝飲福酒
以上尊太尉而下以壘今參詳告廟及封禪日皇帝所
飲福酒蓋上靈降祚以交神明之福望令尚食奉御一
員於上尊酌酒以進庶協禮文從之

癸亥以權三司使事丁謂為行在三司使鹽鐵副使林
特副之 是日奉天書於朝元殿上齋於殿之後閣初

有司撰儀止致齋一日特詔散齋一日

甲子扶侍使等奉天書升玉輅赴太廟南城門內幄殿
有頃車駕至詣幄殿酌獻訖奠告六室至太祖太宗室
告以嚴配之意上涕泗交下左右執事無不感動行禮
次白雲如龍鳳僊人正在廟室上有鶴十四來翔御
史中丞王嗣宗立班失儀因自首上曰憲官當守禮法
然以其性素麤略不之責

乙丑判太常禮院杜鎬等坐誤供九宮神位祭玉罰一

月俸

丁卯以皇城使昭州團練使劉承珪為供備庫使內侍副都知寶神寶管勾大內公事

己巳命殿頭高品周文質提舉陝西賊盜事上諭之曰封祀在近關右之民游惰者衆慮乘間竊發侵擾閭里爾往宜從宜控制除所部兵外或有警急即召鄜延鳳翔兵給使先是西鄙戍卒叛入蕃族者許本族擒獻而厚賞之亦有妄擒堡壁軍士以邀賞者官司不為詳

究枉置於法上聞而憫焉於是詔邊吏審察之 有司
言舊制車駕巡幸皇帝坐晚朝國忌及暇日不休務令
請晚朝視事羣臣不赴起居從之

庚午權判尚書刑部填從吉言與省寺衆官覆視刑部
尚書溫仲舒等所試舉充審刑詳議官彭愈等刑名通
粗多有差互詔問仲舒等仲舒等引禮部侍郎魏庠前
試大理寺詳斷官裴常填錯等所定通為比詔尚書省
集百官議定吏部尚書張齊賢等言常錯所試亦不中

程先是錯以武昌節度推官授著作佐郎充詳斷官至是釐正奪其官彭愈亦罷兵部員外郎直史館張復時知禮部避事不草議狀殿中丞邱雍輒代為之詔罰復

金錯從吉子也

彭愈裴常邱雍未見

辛未詣啓聖院朝拜太宗神御告行也 詔祀事所用

醴酒令有司別擇器用精加醞釀至時進內朕躬親題檢以付有司 考功員外郎知晉州齊化基削籍黥面流崖州縱逢恩赦不在放還之限其子淄州司理參軍

溥同學究出身瀆並削籍與少子滌姪渙分配安鄧汝
蔡州化基所至以貪暴聞性兇狠人皆避之在晉州尤
為苛刻而諸子受賕五百餘匹又蓄銅器衣塗金袍袴
事發遣官鞫化基狡獪懼罪款不實凡三易制使又
令御史艾仲孺拷訊之乃引伏朝議懲其積惡故令族
竄之仍詔諭晉州官吏民庶莫不欣快元推官監察御
史歐陽載等三人悉坐停官

歐陽載修之叔父集有墓誌述載得御史因依馮潔

已御史臺記已辨其不然今不取

印部川蠻王阿道遣將軍趙勿婆

來朝貢勿婆請赴泰山陪位許之

癸酉詔文武官奉使至兗州當升嶽者並公服令王欽若等察之 步軍都虞候鄭誠部前軍先赴泰山

甲戌命諸司副使一員視嶽下諸壇牲牢祭器有不恭其事者遇赦不原 詔諸司奉祀升山人官給衣服令祀日沐浴服之從官衛士至鄆州即禁葷茹公私羊豕不得至嶽下

戊寅西京及諸州民以車駕東巡詣闕貢獻召對勞賜

之

已卯以簽署樞密院事馬知節為行宮都部署詔給事中張秉左正言知制誥王曾管勾所經州縣父老詣行在者送閤門引對賜以酒食州縣見禁囚具所犯以聞

庚辰趙安仁來朝獻五色金玉丹紫芝八千七百十一本龍圖閣待制陳彭年上言曰伏見判太常禮院孫奭奏議封祀白茅止用為藉臣謹按周易曰藉用白茅

春秋左氏傳曰包茅不入王祭不供無以縮酒鄭元注周禮云茅以供祭之苴亦以縮酒此用茅有為藉縮酒二義也鄭興注周禮云束茅立之祭前沃酒其上酒滲下去若神飲之故謂之縮杜預注左氏傳云束茅而灌之以酒為縮鄭元注周禮云縮酒泝酒也又注禮記云泝之以茅縮去滓也此則又有灌酒泝酒二義也今詳定儀注之初孫奭亦言其義但緣經典有此互文事涉闕疑理難臆斷是以儀注之內兩存為藉縮酒之說今

爽以為宗廟之祭有灌鬱鬯之禮故可束茅沃酒學者
不達此旨又以流俗澆酹之儀遂謂諸祠祭皆當束茅
縮酒甚為失所竊詳論語疏云宗廟之祭未殺牲先酌
鬱鬯酒灌地以求神此則獨言以鬱鬯灌地亦不指言
用茅也若依鄭元之言則茅為涕酒若依鄭興杜預之
言則天地宗廟俱滲酒也又周禮祀天神祭祀用蕭茅
左氏又言包茅不入王祭不供以祭言之則通於天地
宗廟明矣况鄭興杜預已有束茅沃酒之言許氏說文

又云酌餼祭也此則酌酒之義鄭興杜預許氏當漢晉
之世已言之矣安得謂之流俗哉然而封禪之禮前史
不備開元之制最為詳悉按元宗實錄唐會要並云其
時撫州三脊茅生上封者言齊桓公將欲封禪管夷吾
云江淮間三脊茅用以縮酒乃可封禪宰臣奏云臣等
博訪貢茅沅江最勝已牒岳州取訖今稱撫州有茅望
令且進六束與沅江相比用之此時宰臣即張說源乾
曜刊撰官即說與徐堅韋縉康子元侯行果並諛詳舊

典號曰碩儒若封禪果無縮酒之義當時豈無駁論既
令取茅充用足驗於禮昭然伏以沃茅之文既經典攸
載酌酒之祭又聖朝久行若謂致爵方為成禮竊恐寅
恭之志未及於宸心改作之譏益生於輿誦其孫奭所
奏伏請不行從之

辛巳詔外州軍士赴京隸役者回日給錦袍遣之

壬午始給升山行事官衛士釘鞋以山路險滑故也

始丁謂請置隨駕使錢頭子司每賜諸軍鞋錢但給頭

子指定於某處支錢軍士各使其家人往請乃詔殿前都指揮使曹璨問諸軍可否士皆曰隨駕得錢難以將行骨肉住營得錢濟用聖恩厚矣遂置使錢頭子司車駕往還支賜略無闕悞

丁謂使錢事附見

癸未左正言直史館權管勾京東轉運司事張知白言咸平中天下多上祥瑞當時河湟未平臣嘗論奏請一切罷去今天下無事靈貺並至望以泰山諸瑞按品目模寫置正副二本一藏秘閣一納中闈竢昭應宮成飾諸

繪事傳之不朽從之

二年正月
丙戌可考

甲申以御史馬亮為契丹國母正旦使西京作坊使魏
昭易副之都官員外郎孫奭為契丹國主正旦使侍禁

閣門祇候薛貽廓副之

昭易咸信子
貽廓未詳

乙酉上親習封禪儀于崇政殿初禮官已再肄習且言
職在有司無帝王親習之文上曰朕以達寅恭之意豈
憚勞也既畢謂輔臣曰適見典禮頗有未便如天書未
下園壇朕已先降又金匱先天書降壇送神畢始奉玉

匱寘礮石禮儀使奏禮畢在望燎前似未協宜置匱礮
中將作監即領徒封固懼為喧雜可與禮官再議以聞
有司言按開寶通禮則燔燎畢封冊開元故事則封礮
後燔燎今若不對神封冊即未稱寅恭或封礮後送神
則併為喧瀆欲望俟終獻畢皇帝升壇封玉匱奉置礮
中印訖次飲福送神樂止燎舉天書降次金匱降禮儀
使奏禮畢皇帝還大次俟封礮訖再拜壇省視緣祀禮
已畢更不舉樂從之又以亞獻終獻皆不作樂問禮官

具言按開寶通禮親郊壇上設登歌皇帝升降奠獻飲
福則作壇下設宮懸降神迎祖退文舞引武舞迎送皇
帝則作亞終獻升降在退文舞引武舞之間有司攝事
不設宮懸二舞故三獻升降並用登歌今山上設登歌
山下設宮懸二舞其山上圜臺亞終獻准親祠例無用
樂之文上以對越天地嚴配祖宗不欲分等威特令亞
終獻並同登歌作樂 高順州貢奉蠻人入辭上諭之
曰各安部族勿相侵擾有自陳親屬為鄰洞所殺求往

復仇上曰事往矣勿復論咸拜而退

此據會要
乃九月事

是月京東西河北河東江淮兩浙荆湖福建廣南路皆
大稔米斗錢七八

冬十月戊子朔上謂王旦等曰朕以封禪非常祀自今
日素膳旦等曰陛下將冒寒馭涉道途保衛聖體恐
未得宜况南郊亦祀天地不聞預禁葷茹望於致齋或
散齋後議進蔬食遂三上表懇請終不許 詔內臣傳
宣取索並齋御寶文字為號仍先降式赴所由司以辨

詐妄 知夔州侯延賞言西南溪洞諸蠻素未修貢今以方物來賀請赴泰山從之

庚寅詔以御史中丞王嗣宗攝御史大夫為考制度使右正言知制誥周起攝中丞為副使所經州縣採訪民間不便事并市物之價車服權衡度量不法者舉儀制禁之有竒才異行隱淪不仕者與所屬長吏論薦鯨寡惇獨不能自存者量加賑卹官吏政績尤異民受其惠及不守廉隅昧於政理者孝子順孫義夫節婦為鄉里

所稱者並條析以聞官吏知民間利病者亦為錄奏

司天言五星順行同色

辛卯有司宿設天書仗位於乾元門晝漏未上三刻自
宮中奉天書出乾元門升玉輅黃麾仗前後部鼓吹道
門威儀扶侍使等導從而行從臣望拜於殿下有頃上
服通天冠絳紗袍御大輦發京師次含芳園之行宮

詔行事官職掌人盡恭奉祀有涉懈慢令憲臺及監祭
使糾舉遇赦不原

壬辰次陳橋驛命宮苑使趙承煦等檢視山上下諸壇
牢饌詔行在諸色人有犯罪並赴行宮都部署馬知節
諸軍即送殿前副都指揮使劉謙量罪區斷情理重者
以軍法從事不須奏聞所在州縣犯罪人送軍頭司未
得引見令樞密院詳度指揮上虔心祀事不欲決罰且
虞小民輕冒禁法故預戒之自降詔至訖事未嘗戮一
人惟二人犯徒流者

癸巳次長垣縣

甲午次韋城縣王欽若等言泰山芝草再生者甚衆黃
河水今歲上流多雨雖時泛溢正在中道不臨兩岸其
堤防比常歲用度工役約省數百萬 河北緣邊安撫
司言契丹防邊人馬自承牒命悉已引去人戶安居商
旅不絕

乙未次衛南縣

丙申次澶州命殿前副都指揮使劉謙西京左藏庫副
使趙守倫於山門閱視升嶽之人著籍乃許上

丁酉次永定驛詔應乘輿儀仗如城門不可入者由城外而過時大輦至澶州有司以城門卑下將撤之上不許因降是詔

戊戌次濮州詔鄆齊單淄等州長吏赴泰山陪位車駕所經黃河護埽軍士並優與特支

己亥次范縣

庚子次壽張縣

辛丑次鄆州

壬寅駐蹕知制誥朱巽言奉玉冊玉牒至翔鑾驛有神
光起昊天玉冊上亟遣翰林學士李宗諤馳往致謝

詔諸州甸設駐泊禁軍諸校其本軍員皆不獲預自今
宜并及之

癸卯命入內高班鄧守恩覆視諸壇牢饌

甲辰詔扈從人宿頓之所無壞民舍什器樹木犯者重
寘其罪 詔緣路急脚遞鋪止當傳送文字如聞使臣
或遣負重以馳咸不堪命自今非宣旨不得輒私役使

乙巳發鄆州夕次迎鑾驛

丙午次翔鑾驛命行宮都部署馬知節於山門駐泊都
大管勾山下公事殿前副都指揮使劉謙都大提舉山
下人馬軍都虞候張旻步軍都虞候鄭誠扈從升山
提舉宿衛兵 行在三司使丁謂言自京至泰山金帛
糧草咸有羨餘又民間以官司無所配率芻藁每圍不
及三五錢粟麥每斗不及十錢

丁未法駕入乾封縣奉高宮上即詣昊天玉冊前焚香

再拜以謝神光之貺

占城大食諸蕃國使以方物迎

獻道左

大食蕃客李麻勿獻玉圭長一尺二寸自言

五代祖得自西天屈長者傳云謹守此俟中國聖君行
封禪禮即馳貢之

戊申上齋于穆清殿王欽若等獻泰山芝草三萬八千
二百五十本

己酉五色雲起嶽頂上與近臣登後亭望之名亭曰瑞
雲知制誥朱巽奉玉冊牒及園臺行事官並先升山上

以回馬嶺至天門路險絕人給橫板各二兩首施綵帛
選親從卒推引而上 詔河北京東轉運使及使還京
朝官未見者許入見陪位

庚戌晝漏未上五刻上服通天冠絳紗袍乘金輅備法
駕至山門改服鞞袍乘步輦以登鹵簿仗衛列于山下
黃麾仗衛士親從卒自山趾盤道至太平頂凡兩步一
人綵繡相間供奉馬止于中路御帳亞獻寧王元偓終
獻舒王元偁鹵簿使陳堯叟從登有黃雲覆輦上道經

險峻必降輦步進有司議益扶衛皆却之導從者或至
疲頓而上辭氣益壯至御幄召近臣觀玉女泉及唐高
宗明皇二碑前一夕山上大風裂帟幕遲明未已及上
至天氣溫和織羅不動奉祀官點饌習儀于園臺祥光
瑞雲交相輝映是夕山下罷警場

辛亥享昊天上帝于園臺以太祖太宗配命羣官享五
方帝諸神于封祀壇儀衛使奉天書于上帝之左上服
袞冕奠獻侍從導衛悉減去拂翟止於壇門籠燭前導

亦撤之攝中書侍郎周起讀玉冊玉牒文上飲福攝中書令王旦跪稱曰天賜皇帝太一神策周而復始永綏兆人三獻畢封金玉匱王旦奉玉匱置于石礧太尉馮拯奉玉匱以降將作監領徒封礧上復登臺閱視訖還御幄司天監奏慶雲遶壇月有黃輝氣宰臣率從官稱賀山上下傳呼萬歲振動山谷上即日還奉高宮官官奉迎於谷口日有冠戴黃氣紛郁

壬子禪祭皇地祇於社首山如封祀之儀上至山下服

鞞袍步出大次侍臣言山路峻滑請乘步輦上曰接神
在邇敢不徒行五使等復固請終不許前夕陰晦風勢
勁猛不能燃燭及行事風頓止天宇澄霽燭焰凝然封
碱訖紫氣蒙壇黃氣如帛繞天書匣悉縱四方所獻珍
禽竒獸于山下法駕還奉高宮日重輪五色雲見鼓吹
振作觀者塞路懼呼動天地詔以奉高宮為會真宮增
葺殿屋務從嚴潔九天司命上卿加號保生天尊青帝
加號廣生帝君天齊王加號仁聖各遣使致告

司命加
號以王

中正之言故也事
見二年二月辛卯

癸丑有司設仗衛宮懸於朝覲壇下壇在奉高宮之南方
九丈六尺高九尺四出陛其南兩陛上服袞冕御壇上之
壽昌殿受朝賀中書門下文武百官皇親諸軍校四方朝
賀使貢舉人蕃客父老僧道皆在列大赦天下常赦所不
原者咸赦之內外諸軍將士比南郊例特與加給文武
官並進秩賜致仕官本品全俸一季京朝官衣緋綠十
五年者改賜服色充鄆州免來年夏秋稅及屋稅仍免

二年支移稅賦工役所過州縣免來年夏屋稅十之五
河北京東州軍供應東封者免十之四兩京河北免十
之三諸路免十之二屋稅並永免折科德清通利軍例
外更給復一年令開封府及車駕所過州軍考送服勤
詞學經明行修舉人其懷材抱器淪於下位及高年不
仕德行可稱者所在以聞三班使臣經五年者與考課
兩浙錢氏泉州陳氏近親偽蜀孟氏江南李氏湖南馬
氏荆南高氏廣南河東劉氏子孫未食祿者聽叙用賜天

下醮三日改乾封縣為奉符縣泰山下七里內禁樵採
大宴穆清殿又宴近臣及泰山父老於殿門賜父老時
服茶帛始議肆赦上謂宰相曰此赦與常時不同但常
赦所不能行者卿等並錄出條目共議之務令實惠及
民也上齋於行宮晁迥進所草赦書故事召對學士天
子著帽而學士止繫鞵迥以方行大禮乃秉笏請對上
入改服見之

甲寅車駕發奉符縣次太平驛是日始復常膳賜從官

辟寒九紫花茸袍上勞王旦等以久食蔬旦等皆再拜
簽署樞密院事馬知節獨言蔬食惟陛下一人耳臣等
在道未嘗不私食肉上顧旦等曰知節言是否又再拜
曰誠如知節之言知節為人質直類此

此據司馬
光記聞

詔

以十一月朔旦幸曲阜縣謁文宣王

乙卯次回鑾驛京東西河北陝西淮南江南等轉運司
並言自有詔封禪以來諸州進奉使蠻夷入貢及公私
往來晝夜相繼鄉邑肅靜物價至賤是時京師至泰山

道路駢擁絕無攘竊

丙辰次兗州以州為大都督府特賜酺三日 詔選人

籤符並破官物書寫給付舊例納官錢特免之

會要十月事籤

符當

考

十一月戊午朔上服鞞袍詣文宣王廟酌獻廟內外設

黃麾仗孔氏家屬陪列有司定儀止肅揖上特再拜又

幸叔梁紇堂命刑部尚書溫仲舒等分奠七十二人先

儒暨叔梁紇顏氏上制贊刻石廟中復幸孔林以樹木

擁道降輿乘馬至文宣王墓奠拜詔加謚曰元聖文宣
王祝文進署仍修葺祠宇給近便十戶奉塋墓又詔留
親奠祭器翌日又遣吏部尚書張齊賢等以太牢致祭
賜其家錢三十萬帛三百疋以四十六世孫同學究出
身聖佑為奉禮郎近屬授官及賜出身者六人又追封
叔梁紇為魯國公顏氏為魯國太夫人伯魚母亦官氏
為鄆國太夫人先是詔有司檢討漢唐褒崇宣聖故事
初欲追謚為帝或言宣父周之陪臣周止稱王不當加

帝號故第增美名春秋演孔圖曰孔子母夢感黑帝而生故曰元聖莊子曰恬澹元聖素王之道遂取以為稱

又追謚齊太公曰昭烈武成王令青州立廟周文公

曰文憲王曲阜縣立廟以右正言知制誥朱巽權知

兗州

江休復雜志云朱巽草制云某官夙負官材真宗令出典藩當考

王欽若等言

曲阜縣民東野宜七世同居乾封縣民竇孟六世同居詔並旌其門閭仍賜東帛

己未上御回鑾驛覃慶樓觀酺凡三日

庚申賜輔臣親王百官宴於延壽寺凡二日有金龜集
游童衣袂大如榆莢丁謂得之以獻上亟命中使齎示
羣臣

辛酉上作慶東封禮成詩從臣皆和 內侍史崇貴言
准詔館伴諸蕃進奉使咸以親逢大慶得預陪列求賜
紫袍象笏歸耀國族從之

壬戌發兗州次中都縣王欽若趙安仁還奉符縣詔令
蔬食升嶽省視圜封

癸亥次鄆州上覩城中巷陌迫隘詢之云徙城之始衢路顯敞其後守吏增市廊以收課即詔毀之

甲子宴百官于行宮

乙丑御升中延福樓宴從臣又宴父老于樓下詔節度觀察防禦團練刺史因東封為諸州駐泊部署鈐轄者並賜襲衣金帶器幣舊制蕃侯在外遇大禮無賚及之例今特賜焉

丙寅次壽張縣

丁卯次范縣賜曲阜縣元聖文宣王廟九經三史令兗州選儒生講說又賜太宗御製御書又以經史賜兗州賜兗鄆知州羊酒緡錢令宴諸僚屬行宮司言有

扈駕捧日卒彭攀於社首廟前逢一叟衣冠甚偉曰升山之路異於往時動至感應皆聖德所致也從臣皆昔陪唐帝祀嶽者唯八人非然四存而四亡矣言訖西南行不知所往

戊辰次濮州

己巳宴從臣于告成均慶樓父老于樓下 詔緣祀官
物合輦還者俟來春於清河廣濟河水運至京師其鋪
卒悉放歸營仍給賜 甘州回鶻可汗伊魯格勒巴烏公

主及其宰相各遣使來貢賀東封也

庚午次永定驛遣翰林學士李宗諤祭澶州河瀆廟
辛未次澶州幸河瀆廟酌奠以頓邱縣令兼充廟令以

兗州父老呂良攝本州助教良首請東封故也
壬申宴從臣父老于駐蹕延禧殿行宮在河南其地迫

隘故於宮南當衢結綵為殿因賜名焉 王欽若趙安
仁自兗州來見 總噶爾族大首領溫布等遣使入貢
癸酉發澶州次韋城縣宴從臣父老于行宮

甲戌次長垣縣宴從臣父老于行宮

乙亥次陳橋驛後苑兵匠凌訓獻七寶減輕逍遙輦式
上曰前詔乘輿服御悉從儉約訓輒敢違詔可特免罪
毀其式

丙子發陳橋驛次含芳園時近輔淮南京東河朔之民

自泰山迎候車駕奔走以望天顏者道路不絕 詔增
天書仗衛六百人其後遂以一千六百人為定 制加
號河瀆曰顯聖靈源公遣右諫議大夫薛映往河中府
比部員外郎丁顧言往澶州祭告又命映祭謝汾陰后
土 詔天書儀衛使副扶持使都監夾侍等自今著令
凡遇大禮即與五使並命從丁謂之請也

丁丑車駕至自泰山扶持使丁謂奉天書歸大內上御
乾元樓召近臣觀衛士甲馬還營賜百官休假三日中

書樞密院一日上之巡祭也往還四十七日未嘗遇雨雪嚴冬之候景氣恬和祥應紛委咸以為精誠昭格天意助順之致也

壬午契丹使左武衛上將軍蕭永啟聖節度使耶律留寧副使左驍衛大將軍董繼澄衛尉少卿楊又元來賀承天節 詔以正月三日天書降日為天慶節休假五日京師於上清宮建道場七日宰相迭宿罷日文武官內職皆集賜會錫慶院是夕京師張燈五日內無得用

刑仍禁屠宰諸州建道場三日羣臣亦賜會丁謂請以
天書降後祥瑞編次撰贊繪畫于昭應宮詔謂與龍圖
閣待制戚綸陳彭年同編次其贊令中書門下樞密兩
制尚書丞郎給諫待制館閣官分撰

癸未上謂王旦等曰近覽邊奏皆言今歲物價甚賤芻
藁三錢易兩圍麥粟斛百餘錢此民間儲蓄之時歲有
豐約固亦常理古之善教不若備預也况北戎願保歡
好頗見其情但固守封疆足以安吾生聚或言敵多狡

詐急當為寇此非遠識也旦曰國家納契丹和好已來
河朔生靈方獲安堵雖每歲贈遺較於用兵之費不及
百分之一昨陛下登封告成天地助順蓋人事和而天
象應也 詔并代州別賜酺三日時承受使臣言前設
酺宴不豐軍校皆不預會也

甲申命宰相王旦攝太尉奉上太祖太宗謚冊知樞密
院事王欽若參知政事馮拯攝中書令讀冊文禮畢親
享六室先是詔有司參詳百官拜表進名儀式且言慶

成喬嶽歸美祖宗雖繫孝思實為古禮比之初上廟號
理有不同按唐朝修八陵及遷懿獻二祖禮畢並皆稱
賀欲望其日許百官詣閤門拜表賀從之

乙酉大宴含光殿勞旋也

丙戌詔自今祭告天地社稷宗廟嶽瀆其后土亦致祭
著于令

十二月丁亥朔封皇第八妹萬壽長公主為隋國長公
主出降右龍武將軍駙馬都尉李遵勗遵勗繼昌子也

初止名最上益以遵字而升為崇矩子焉 遣中使分
往緣邊諸路賜部署鈐轄等羊酒令宴官吏將校 詔
泰山路以解舍倉驛為行宮並依舊其奉安天書位謹
護之 詔東封所過諸州本城軍校邀車駕訴年深未
遷者特與改轉 令內外諸軍勿得科率部下盛為軍
裝初興元府寧朔戍將課軍中服錦繡以壯戎容士伍
廩給不充其費因相與亡命為盜上知之故有是誠
庚寅知樞密院事王欽若等言皇帝受冊尊號百辟就

列稱慶臣等與諸司使副於殿上侍立欲俟上寶冊畢
太尉歸位臣等於殿上率侍立羣臣致詞稱賀從之
辛卯御朝元殿受冊尊號

壬辰謁啟聖院太宗神御殿 命丁謂李宗諤戚綸陳
彭年等編修封禪記從彭年之請也

乙未契丹使蕭永等辭歸國故事契丹使辭當賜宴不
視事上以累屬休假慮機務有壅遣中使諭中書樞密
院許先奏事 詔瀘州南井煎鹽竈戶自今遇正至寒

食各給假三日所收日額仍除之 有司言祭不欲數
請罷太廟臘享其皇后廟及元德皇太后廟如故從之
丁酉內出泰山封祀上尊酒及玉女白龍王母池水新
醴泉賜輔臣 詔東京留守司及在京掌事內臣不該
賜物者特給之 補延州小胡族朗阿為侍禁賜名忠
順是族在州之西北連慶州蕃境鈐轄司言王師每出
藉其鄉導故獎之

己亥朝拜普安禪院元德皇太后聖容

庚子以回鶻伊魯格勒為特進忠順保德可汗王其母為
賢明巴烏公主進奉使悉授官賜袍笏伊魯格勒常言本
道捍禦趙德明乞朝廷發兵署孔目官一名至本道詔
諭以德明順命且慮官吏至彼騷擾第遣使偕往

辛丑工部尚書平章事王旦為中書侍郎兼刑部尚書
平章事楚王元佐為太傅左衛上將軍依前養疾寧王
元偁為護國鎮國節度使舒王元偁為平江鎮江節度
使並兼侍中廣平郡王元儼為昭武安德節度使進封

榮王 是日上謂王旦等曰先帝每命宰相親王降制則不御崇德殿視朝應有故事其旨以命宰相親賢示

帝王不專耶

此據會要當考

癸卯知樞密院事王欽若參知政事馮拯知樞密院事陳堯叟參知政事趙安仁簽署樞密院事馬知節並進官一等太子太師萊國公呂蒙正進封徐國公羣臣並以次覃恩

甲辰以宣政使恩州團練使李神福為宣慶使領昭州

防禦使先是諸司使極于宣政上特建使額以獎神福
焉 詔提點刑獄朝臣使臣不限品秩及諸班諸軍都
虞候並與一子恩 詔應天下宮觀陵廟有名在地志
功及生民者並加崇飾 又詔江淮發運轉運司部內
各留三年之儲以備水旱先是江淮米悉運送京師至
是司天監言揚楚之分當水旱為沴防患故也

丁未詔四瀆祝文自今並進署舊制常祀學士院惟五
嶽進署四瀆則否故有是詔 先是上謂王旦等曰皇

親在環衛者甚衆宜第其久次者俾領郡於是左監門衛大將軍德雍等八人各授刺史右領軍衛將軍允升等五人各遷秩德雍等在班十八年允升等在班七年德雍廷美第四子也

己酉詔太常寺別製天書樂章俟親饗園丘日以奉禋祀又詔取天書降及議封禪以來祥瑞尤異者別撰樂曲以備朝會宴饗於是太常寺請郊祀酌獻天書用瑞安曲天書升降用靈文曲又上朝饗用醴泉神芝慶雲

靈鶴瑞木五曲請下兩制撰詞從之 復州防禦使駙

馬都尉柴宗慶遇恩自康州移復州不告謝為有司所
舉以違制論當贖銅三十斤有詔末減罰兩月俸 辰
州大洞狃獠大都頭魏進武及洞主首領覃架圖等以
方物來貢 西涼府斯多特遣使來貢馬

庚戌置京新城外八廂上以都門之外居民頗多舊例
惟赤縣尉主其事至是特置廂吏命京府統之

辛亥命戶部尚書寇準知天雄軍兼駐泊都部署契丹

使嘗過大名謂準曰相公望重何故不在中書準曰主上以朝廷無事北門鎖鑰非準不可爾

壬子契丹使左武衛上將軍蕭知可興國節度使蕭留寧副使崇祿卿成永少府監徐備來賀明年正旦入內高品王承勛等言訪聞賀正使一即國母之弟一即國母之親皆其所委信望比常使量增恩例上以禮數有定不許承勛文壽子也

甲寅以南衙為錫慶院先是酺宴則集于尚書省或都

亭驛誕節齋會則就相國寺上以佛舍中烹餼嬉笑有
虧恭潔乃令內臣度館于顯敞者易之南衙即太宗尹
京時府邸秦王許王繼居馬廐後虛其正位故以為院
詔緣邊并連接溪洞州軍其間通判職位高於知州
者並勘會移易

詔進奏院不得非時供報朝廷事宜令進奏官五人為
保犯者科違制之罪

此據會要
不得其月

是歲天下戶七百九

十萬八千五百五十五口一千七百八十萬三千四百

一 契丹主追尊按巴堅廟曰太祖德光曰太宗璟曰

世宗

鄂約

明曰穆宗


舒嚙

賢曰景宗

明記

又贈東丹人皇倍為

護國皇帝自在太子阮為恭順皇帝



欽定四庫全書

史部

續資治通鑑長編卷七十二

詳校官檢討臣劉錫五

刑部郎中臣許兆椿覆勘

纂修官編修臣楊壽楠

謄錄貢生臣苗序濂

欽定四庫全書

續資治通鑑長編卷七十一

宋 李燾 撰

真宗

大中祥符二年春正月丁巳朔召輔臣至內殿朝拜天
書自是歲以為常因觀殿庭假花樹上曰此花舊多翦
綵為之今止用草自今郊禋青城園苑亦令准例

癸亥以封禪慶成召宗室輔臣宴射苑中賜襲衣金帶

器幣

乙丑置內殿承制在崇班上秩視殿中丞 改浚儀縣

為祥符縣 詔天慶節宴會上元張燈所須什物令三

司製造給用先是開封府於坊市假借或因緣擾人或

至隱沒故有是詔 賜甘州輝和爾汗伊嚕格勒介曹從

所乞也 西南夷鞏州內屬詔鑄印給之 申鎔金以

飾器之禁

戊辰詔自今開封府殿前侍衛司奏斷大辟案經裁決

後百姓即付中書軍人付樞密院更參酌審定進入俟
畫出乃赴本司其雖已批斷情尚可恕者亦須覆奏其
逐處錄問罪人並當別差人吏不得令元推典祇應
又詔自今有誘人子弟不問尊長求析家產或潛舉息
錢輒壞墳域者令所在擒捕議從流配

已巳封皇姊晉國長公主為大長公主皇妹魯國長公
主為韓國長公主壽昌長公主為陳國長公主先是上
謂宰相曰先帝時公主初降月俸百五十千其後稍增

至二百千至道中先帝嘗許諸主增俸明德皇太后為朕道先帝語始增及三百千此不可復增矣今初出降者亦求此數曾未喻諸主初給俸時俱未得此也東封行慶朕欲但加美號爾漢制天子之女稱公主姊妹稱長公主姑稱大長公主後漢皇女皆封縣公主其尊崇者亦加號長公主唐制有以國名郡名或美名者而皇姊無大長之稱今有是命緣後漢尊崇故事也 封禪經度制置使王欽若等上祇應祀事京朝官使臣藝術

官功次詔第一等優與改轉其次遷官仍加階勳藝術人第改章服 詔諸路轉運使知州軍緣東封遣親屬牙校奉貢至泰山者並與遷轉未有官者令學士院試藝授試秩出身 御史中丞王嗣宗言翰林學士楊億知制誥錢惟演秘閣校理劉筠唱和宣曲詩述前代掖庭事詞涉浮靡上曰詞臣學者宗師也安可不戒其流宕乃下詔風厲學者自今有屬詞浮靡不遵典式者當加嚴譴其雕印文集令轉運使擇部內官者詳以可者

錄奏

江休復云上在南衙嘗召散樂伶丁香畫承恩幸楊劉在禁林作宣曲詩王欽若密奏以為寓諷遂

著令戒僻文字

今但從國史

上自東封還羣臣獻頌稱賀功德者相繼惟進士孫籍獻書言封禪帝王之盛事然願陛下謹於盈成不可遂自滿假上善其言即召試中書庚午賜同進士出身

孫籍

未見時知制誥周起亦上言天下之勢常患恬於安逸而忽於兢畏願毋以告成為恃上深納之

初樂善州蠻寇融州之羅城及武陽武陽主簿楊奭募

丁男與州兵捕逐為賊所傷歿於任壬申賜奩子汝賢
同學究出身

甲戌詔豐州防禦使王承美月增俸錢五萬自承美內
屬祿賜止同蕃官例至是特給焉

本傳以增俸即在景德初遷防禦使時今

從實錄

乙亥召諸軍將校百夫長以上至崇政殿閱履歷而第
遷之凡四日乃畢 去冬有詔京師賜酺五日以二月
五日為始於是久旱右僕射張齊賢言宴樂陽事也甫

經上元又將酺飲恐非所以答天意請俟雨足乃如詔
旨從之

先是羣臣奏諸軍校御衆嚴緊者至遷改日所部兵即
慢易不與同力般移其寬弛貪黷者乃共津送饋遺錢
物軍政如此無所懲勸乞自今廂主以下至指揮使員
僚或轉補出營者並量定般移人數敢慢易則嚴斷之
仍禁止其饋遺丁丑詔殿前侍衛軍頭司宣徽院並依
奏施行 捧日左右廂都指揮使蔣信王瑀等八人並

罷軍職正授諸州團練使尋命知濮單洺澤衛莫濟唐
等州仍擇官通判州事

已卯詔龍圖閣待制班視知制誥在其下於是龍圖閣
待制戶部郎中直昭文館戚綸工部郎中直史館陳彭
年並兼集賢殿修撰上既升待制之秩以館職弗稱又
不欲罷綸等兼俸故有此授

初蘇州僧道元繡佛祖訖近世名臣禪語為傳燈錄三
十卷以獻詔翰林學士楊億知制誥李維太常丞王曙

判定昭宣使劉承珪領護其事庚辰億等上其書命刻
板宣布 詔左降官遇恩不遷者月增俸錢 上聞京
師有壯年為盜被黥者多縱不逞令開封府具名捉搦
配隸外州

職方員外郎秘閣校理舒雅前知舒州秩滿請監州之
靈僊觀許之雅常薦王欽若至是欽若言其淡於榮利

癸未命雅直昭文館

雅吳人未見州邑

令知府州折惟昌出

兵護麟州所運芻糧以馳毛川路乃戎人蹊徑也

金部員外郎馬元方知鄆州標牧地數千頃不侵民而
集事甲申命為京東轉運副使尋遷轉運使以殿中
丞孔勗知曲阜縣兼檢校先聖廟賜緋魚辭日賜帛月
給如通判例東封謁廟勗兄冕先掌廟事素不謹勗時
通判廣州王欽若言其治行召而命焉勗在廣州以清
潔聞及被召蕃酋爭持寶貨獻皆慰遣之勗請就宣聖
廟創立學舍及於齋廳講說皆許之勗冕皆宜子也
改軍頭司伴飯指揮使為散指揮使五代已來軍校立

功無闕可署者第令諸校同其飲膳因以為名是後目
為冗秩唯被譴者處之上以其名品非正故改焉

乙酉命戶部尚書溫仲舒右丞向敏中與吏部流內銓
注擬選人先是上謂輔臣曰吏部銓引對羣吏或經旬
不入何也陳堯叟曰選人甚多極聞稽滯因言舊有鑱
銓之制上曰今員多闕少四時許選猶慮壅塞况鑱銓
乎堯叟又請取舊省員復置如六曹官凡百州乃得六
百員王旦曰今選集待闕者二千餘人縱增二三百員

亦無益也乃詔仲舒等同領選事以督之 命右司諫
直史館張知白按巡陝西路去冬華解少雪穀價騰貴
流民入唐鄧州轉運使言瀕河倉庾止有二年之蓄故
遣使視之 詔天下宮觀各度道士一人寺院僧尼滿
百人度二人不滿百人亦如之

丙戌張知白言先詔郡國有祥瑞不得以聞止報禮部
封禪以來珍符駢集今郡國悉以上聞望申明前制從
之 監察御史俞獻可言請天下瑞物不在圖牒者毋

得以聞

獻可歙州人為御史在景德四年三月王
嗣宗薦也所言不得其時附張知白後

羣

牧制置使陳堯叟言京東西河北陝西路除係官牧地
外有逃土閑田可以放牧而與民家接者請官和市之
或易以沃壤無妨其農種仍遣官巡視標定詔從其請
是月以美人劉氏為修儀才人楊氏為婕妤

此據會
要當考

詔諸路轉運使副提點刑獄朝臣使臣許蔭子願蔭弟
姪孫者從其請

二月戊子詔如聞近歲命官祈雨有司第給祝板不設

酒脯按令文凡祈以酒及脯醢報准常祀宜令有司自
今祈報虔遵禮令務在蠲潔

己丑改入內內侍省內侍供奉官為內東西頭供奉官
殿頭高品為內侍高品高班內品為內侍高班黃門為
內侍黃門凡六等並冠本省之號其初補者曰小黃門
經恩遷補則為黃門其內侍省供奉官殿頭高品高班
黃門准此

庚寅入內內侍省都知南作坊使李神祐內園使石知

顯副都知西京左藏庫使張景宗供備庫使藍繼宗並
罷職時東封行慶內臣有扈從升山或不升山及不在
從祀之列者命神祐等第其勞効而叙遷之入內供奉
官范守遜皇甫文史崇貴張廷訓等皆嘗有譴累而互
陳勞効且言神祐等品第非當泣訴之于上上止之止
而復來者數四守遜等初並改內常侍上怒悉停其官
神祐等亦坐責焉 詔內臣任諸司副使有子隸入內
內侍省經恩未遷者並特遷補一人 先是詔吏部銓

取常調選人通經者為南宮北宅侍教銓司以新東關
縣令李頌前武進縣尉時大雅名聞令中書召問經義
皆通於是擢授大理衛尉寺丞充職

李頌時大雅仲讀
俱注咸平元年正

月癸酉蓋自
此始用京官

陝西旱令發廩賑糶

先是有汀州人王捷者咸平初賈販至南康軍逆旅遇
道人自言姓趙氏是冬再見於茅山命捷市鉛鍊之少
頃成金捷即隨至和州諸山得其術又授以小鏡神劔
密緘之戒曰非遇人主切勿輕言捷詣闕求見不得乃

謀以罪名自達至信州佯狂大呼遂坐配隸嶺南未幾
逃至京師官司捕繫閣門祇候謝德權嘗為嶺南巡檢
知捷有異術為奏請得釋乃解軍籍劉承珪聞其事為
改名中正得對龍圖閣具陳靈應特授許州叅軍留止
皇城解舍時出遊鄜市常有道人偶語云即授中正法
者司命真君也承珪遂築新堂乃以景德四年五月十
三日降堂之練幃中戴冠佩劍服皆青色自是屢降中
正常達其言既得天書遂東封加號司命天尊是為聖

祖凡瑞異中正必先以告辛卯授中正左武衛將軍致仕給全俸賜第通濟坊恩遇甚厚 詔諸軍校准赦當遷者所在叙其勞効及詢其所欲以聞上以諸軍增俸有元給不及千洎二千者例加至三千頗為不等乃令樞密院取有勞者旌別之 賜大食國王銀飾繩床水罐鞍勒馬器械旗幟等從其請也

壬辰禁諸州馬監牧卒擾村民

甲午賜衡州刺史陳文顯內地刺史俸料文顯知濮州

有置頓之勞自康州遷衡州又增俸以獎之 令禮賓院勾當官遞宿本院諸蕃貢奉人忿爭者就和理之 乙未詔河北諸州強壯自今每歲十月至正月以旬休日召集賢校閱免奪農時

丁酉免文武官所市食羊算錢 罷諸路部署司取箭鏃醫人悉遣赴闕 登州言東封已來海不揚波 戊戌西涼府六谷都首領斯多特遣使來貢

庚子上謂王旦等曰陳國長公主幼不如葦先朝或抑

令食之則病自是許其剃度今當徙外寺朕計其營創
踰歲未畢又念唐金真玉僊遺事可戒今止以保和坊
光教院賜之就加完飾頗亦寬敞其光教尼衆以舊布
庫給之旦等曰即舊完葺功用省倍陛下愛民惜費天
下幸甚

辛丑分遣使臣出常平倉粟麥於京城四面開八場減
價糶之以平物價

壬寅命太常博士直史館河南王隨為契丹國母生辰

使供奉官閣門祗候王承瑾副之初王繼忠嘗因入契丹使回獻名馬貂錦等物以賀東封於是答賜器幣令隨等齎詔以往 詔自今契丹使有例外贈遺接伴館伴使者再辭不已則許納之官給器幣為答初契丹使蕭知可等至白溝驛與送伴使陳知微酌酒為別遣舍利以所乘馬遺知微又以二馬至今自擇之知微固辭不受上務懷遠俗故有是命

癸卯禁道士以親屬住宮觀者

甲辰詔蠲同華等州民去年逋租

乙巳幸大相國寺上清宮景德開寶寺祈雨戊申又遣

官祀太一又祀元冥五星於北郊巳酉雨

實錄於甲辰即書雨而乙

已戊申兩日猶祈焉恐誤也今從本紀

命河北東緣邊諸州本城軍校

有關者即以次遷補勿復奏裁 禁緣峽江諸州津鋪

邊留客旅舟船以白錢令本州察之 令同州都監李

繼一兼管界都巡檢使以州民艱食徹寇盜也 樞密

院言昨奉詔賜酺以愆亢權罷今時雨露洽欲奉行前

詔從之以三月十六日為始

庚戌布衣林虎伐登聞鼓上言國家遣官祈雨車駕徧詣宮寺雖再雨而未足願去邪佞尸素之臣明賞罰黜陟之令則天自雨上曰所言邪佞尸素當明斥其名賞罰黜陟悉陳非當朕豈吝於采拔然姓林名虎尚怪者也命中書召問虎無以對罷之以盧多遜子復州司士叅軍察付吏部銓注簿尉察景德二年舉進士禮部奏名在高等或言多遜子不當與科第故特命為州掾

及是乃授親民官明年察奉多遜喪歸葬襄陽又詔本

州賜察錢三十萬

此據本傳附見

應天府民曹誠以此貲募工

就戚同文所居造舍百五十間聚書千餘卷博延生徒
講習甚盛府奏其事上嘉之詔賜額曰應天府書院命
奉禮郎戚舜賓主之仍令本府幕職官提舉又署誠府
助教舜賓同文孫綸子也

辛亥詔審刑院大理寺應御史臺開封府案牘速即奏
斷以方春慮獄繫淹久也

癸丑大常博士知溫州李邈言准詔禁金銀箔線裝飾
服用之物伏見兩浙僧求勾金銀珠玉錯末和泥以塑
塔像有高袤丈者毀碎珍寶寢以成俗望嚴行禁絕違
者重論其罪從之

李邈
未見

甲寅以樞密直學士權三司使事丁謂為三司使 封
太常博士陳從易祖母詹氏為河間縣太君從易以東

封恩例當封母妻請回妻封以及祖母故也

非事始則
削去當考

據會要前此蓋
未有此例也

雄州言歸信縣民榮恕旻家二榆合

為一怒旻兄弟先已析居因復同處

是月併香藥權易院入權貨務

三月丙辰朔司天言太陽當虧陰晦不見 登州言女
真國人錫喇卜等遇風飄船至州詔給其資糧候風便
遣還

壬戌詔向以邊防不可無備遂令河北河東修葺城隍
繕治器甲樞密院可作條件付邊臣每季首同閱視訖
以狀聞遵為永制

癸亥開封府言准赦解薦服勤詞學經明行修五十人
令考試得進士十二人諸科十七人詔重銓擇必充其
數

丙寅詔諸路官吏迎送使命止許一兩員出城不得過
三五里如違重寘其罪仍不在陳首之限

戊辰詔諸州進奏官十年已上者並補三班奉職自今
遇郊祀叙補五人

己巳給戎瀘州公用錢 于闐國主和罕王遣輝和爾婁

都爾遜等來貢婁都爾遜跪奏曰臣萬里來朝獲見
天日願聖人萬歲與遠蕃作主上詢以在道幾時去此
幾里對曰涉路一年晝行夜息不知里數昔時道路常
苦剝劫今自瓜沙抵于聞道路清謐行旅如流願遣使
安撫遠俗上曰命使益以勞費爾國今降詔書汝即齎
往亦與命使無異也

辛未上御朝元樓觀酺自是凡五日

丁丑賜右贊善大夫辛若蒙錢三十萬若蒙前知賓州

遇宜賊起官軍討捕若蒙以家錢給公用至是蕃官引對而有是賜

己卯左屯衛將軍允言降授太子左衛率允言累曠朝謁初稱有疾及遣醫診視則無恙故責之既而允言兄右驍衛將軍允寧等列狀請復舊官上嘉其雍睦從之允言元佐第二子允寧元份長子也

環慶都鈐轄曹瑋發兵開浚慶州界壕塹趙德明移牒廊延路鈐轄李繼昌言其事蓋德明多遣人齎違禁物

竊市於邊間道而至懼壕漸之沮也朝廷方務綏納庚辰詔瑋罷其役詔曲阜縣元聖文宣王廟木圭易以玉兗州伏羲廟圭易以玉石

乙酉鑄龍圖閣印文曰龍圖閣御書記

夏四月丙戌朔遣使分詣昇洪桂州集諸州軍監雜犯配軍人與長吏監軍同料簡之徙配淮南路其少壯堪擐帶者部送赴闕分隸上軍如不願量移及赴闕者亦聽之

丁亥賜金明池善泅軍士緡錢先是每歲為競船之戲縱民游觀者一月車駕必臨視之時以酺宴方畢罷親幸故有是賜仍許羣官游賞御史臺皇城司不得察舉詔羣臣保舉幕職州縣官不得以初任及無勞績者充數

戊子遣內殿崇班閻門祇候侍其旭乘傳詣戎瀘州招撫夷人自任賽遇害之後夷人不自安遂集衆為亂雖屢示招誘而侵擾不已故令旭與轉運使滕涉本州長

吏諭以禍福如尚敢拒命即就集酋首以兵威警之苟
能悛心咸釋其罪儻執迷不改須至加兵即與鈐轄等
經度以聞又令樞密院召前梓州路轉運使李士龍詢
其便宜士龍言瀘州江安縣最當要衝望徙富順監監
押宋貴和知縣兼本縣監押仍給精兵三百人從之士龍
平陰人貴和未見武勝節度使駙馬都尉吳元辰純謹謙遜
在藩鎮有憂民之心待賓佐以禮處事畏慎所至能檢
下未嘗踰矩奉身簡素鮮聲色狗馬之好所得祿賜皆

分給親族之孤貧者於是受詔知徐州請對言臣族屬至多其堪任祿仕者皆已奏薦不任者悉均俸贍之公主有乳媪在得入參宮禁慮臣去後託以干祈望陛下不納上深所嘉歎帝壻中獨稱其賢

昇州火已丑遣入內高品郝昭信馳驛究劾被傷者賑卹之死者官為瘞埋他日上語輔臣曰昇州民居貧富相接有倉庾間廁聞火所及唯富室蕩盡公廩貧舍一無所損此亦異甚矣

庚寅令兩制龍圖閣待制與太常禮院取祕書省學士
院祝板據正辭錄重定付逐司遵用 分定天書及大
駕儀仗別飾玉輅以奉天書題榜曰天書玉輅

辛卯令國子監舉服勤詞學經明行修進士諸科各十
人前詔止開封府洎所過州軍至是本監上言故及之
詔泰山朝覲壇陪位僧並加恩或每人度一弟子

壬辰江淮發運使李溥言江淮廩粟除留州約支及三
年外當上供者凡一千三百餘萬石每歲水運止及五

百萬今歲當及七百萬望少損其數上曰足食養人之

本豈患太多耶

自望少損其數已下並取實訓實錄無之然望少損其數亦不審溥所謂當考

溥又言糧綱卒隨行有少物貨經歷州縣悉收稅筭望與蠲免從之 詔諸蕃貢物咸令估價酬之如聞左藏

庫減抑所直目曰潤官自今宜禁之 給事中判集賢

院种放得告歸終南山是日召見宴餞于龍圖閣上作

詩賜放命羣臣皆賦且制衣序杜鎬辭以素不屬文詔令

引名臣歸山故事鎬因誦北山移文其意蓋譏放也明

日上出晁迥已下詩序示王旦等因品題之以迥詩及
楊億王曾序為優詔令別自繕寫送放時論榮之

河北旱乙未遣使祠北嶽

丙申入內供奉官鄭志誠自茅山使還言至昇州見黃
雀羣飛蔽日往往從空而墜又聞空中若水聲上曰是
皆異常而州不以言何也令出古書示王旦等曰此皆
民勞之兆若守臣知人疾苦能防於未然則可免禍今
張詠在彼吾無慮矣先是城中多火詠廉得不逞之民

潛肆燔爇者折其足而斬之由是遂絕丁酉遣侍御史
趙湘至昇州設齋醮訪民疾苦被火家悉蠲屋稅仍令
本州正其地界無使豪族輒有侵冒 陳州言地污下
歲苦積潦請自許州長葛縣浚減水渠并治補棗村故
道入蔡河從之

戊戌皇城使劉承珪上內藏庫都帳凡置庫以來其出
納之數纖悉具在上嘉其勤詔賜承珪馬二匹器幣二
百掌事官典並遷秩賜緡錢承珪初掌庫後又提總其

經制多承珪初創云 詔諸路州軍雖封部簡靜而獄
空及季者自今亦賜詔獎之

己亥以三司使丁謂為修昭應宮使翰林學士李宗諤
為同修宮使皇城使劉承珪為副使供備庫使藍繼忠
為都監鑄印給之初議作宮命謂經度謂欲殫國財力
規模宏大近臣多言其不可殿前都虞候張旻亦言土
木之侈不足以承天意上詔問謂謂曰陛下富有天下
建一宮崇奉上帝何所不可且今未有皇嗣建宮於宮

城之乾地正可以祈福羣臣不知陛下此意或妄有沮止願以諭之既而王旦又密疏諫上上諭之如謂所對旦遂不敢復言於是特建使名令謂專總其事 昭應宮言鄭州賈谷山採修宮石段輦載頗難望遣使計度自汴河運送從之 鎮定州言芻藁圍直五錢喬麥斗直百錢

庚子莊穆皇后大祥先是詔問禮官禮官言禮文不載詔特廢朝羣臣詣閤進名奉慰

辛丑知秦州楊懷忠言本州採木請開疆百餘里召地主給以茶綵上曰豈有入我境百餘里而不用兵驅逐耶王旦曰國初高防知秦州嘗議闢地為採造務戎人騷動太祖命吳廷祚代之降詔撫諭蕃落始寧馬知節曰拓土為內地又須置兵防守上曰如此豈得無誅殺耶不若取路採木所經族帳賚以緡帛則何求不得如止貪木乃取無用之地使害及遠人非朕志也

壬寅詔諸州長吏舉察獄訟無致枉濫 又詔內外羣

臣非休假無得羣飲廢職時都官員外郎知湖州蘇為
率官屬涉溪載樂詣道場山祈雨會飲暮歸舟重而側
判官劉繼能及樂妓二人溺死餘人僅免為被譴釐務
遂下詔申警焉 民間多鎔錢點藥以為鋤石銷毀貨
幣滋長奸濫命有司議定科禁請以犯銅法論上特寬
之犯二兩者科銅一兩之罪至死者奏裁及京師營宮
觀器飾有當用銅而塗金者皆以鋤石代之置務點造
於陝西採盧甘石供用亦禁民販鬻

癸卯詔自今公私文字中有言及玉皇者並須平闕
詔自今諸路轉運使副提點刑獄所舉官如進改後五
年無過有勞幹者并舉主特加酬獎上謂宰臣曰舉官
犯賊則連坐而舉得其人者賞亦弗及非所以勸也故
有是詔

乙巳徙保德軍屯兵於并州就糧先是以麟府難於饋
運故徙之渡河保德芻糧亦鮮故復徙焉

丁未令陝西州軍發廩以賑饑民

戊申詔司農寺京師所糶常平倉粟前詔雖已減價可更斗減五錢自是訖六月凡糶九千餘斛京市物價以故稍平

己酉詔天下名山洞府並禁樵採

庚戌令太常禮院詳定天慶道場齋醮儀式頒諸州

壬子詔應以門資授京官年二十五已上求差使者當令於國學聽習經書以二年為限仍令審官院與判監官考試訖以名聞是秋當引對者九人大理評事錢象

中奉禮郎陳宗紀以學業未精令且習讀俟次年引對

錢象中陳宗紀未見

癸丑遣使分詣河東江浙廣南路銀銅坑冶撫視役夫
憫其勞也殿前侍衛司言虎翼已下禁軍願赴昭應宮
効力從之令別定添給頻與換易 權知兗州朱巽言
泰山修封畢詔獎之賜兵匠等緡錢園臺增高一丈五
尺又增社首壇高一丈六尺並廣五十尺云

甲寅詔自今令宰臣依故事赴文德殿常朝立班

此據會要

四月二十九日事

瀘州言近界諸蠻交相侵奪請益兵禦之上曰遠方之人但須撫慰使安定耳河北安撫司言北界人多病腮腫死邊民稍南徙避疫詔醫官院處方并藥賜之

五月乙卯朔詔追封孔子弟子充公顏回為國公費侯閔損等九人為郡公成伯曾參等六十二人為列侯宰相羣官分撰贊初議加封十哲爵以公自餘侯王旦曰顏子舊封充公並為公爵則亞聖無以異望封顏子國

公餘為郡公從之旦當撰顏子贊辭曰伏覩太祖嘗御製贊令東封慶成陛下親幸鄒魯先師門人俱崇爵號如顏子贊願陛下自為之上曰朕特命卿無固辭也

丙辰高陽關言河北軍校每有遷補多率其伍以銀花為獻望行禁止從之 韶州獻頻婆果後以道遠罷之

此從本紀實錄作千歲果未詳何物也

丁巳內出藥及方賜王旦皆上所緘題以旦多疾體羸故也 詔修昭應宮自今八作司不須兼領 復置東

竄務

景德四年七月廢兩竄務

初登泰山王欽若言唐高宗元宗二碑之東石壁南向平峭欲即崖成碑以勒聖製上曰朕之功德固無所紀若須撰述不過謝上天敷佑叙祖宗盛美爾戊午上出登泰山謝天書述二聖功德銘及九天司命保生天尊周文憲王等贊玉女象記示輔臣

辛酉詔權罷今年貢舉

壬戌詔兗州長吏以天書降泰山日詣天貺殿建道場

設醮以其日為天貺節令諸州皆設醮從知并州劉綜

之請也其後又禁屠宰刑罰賜會如天慶節之制

節名據實

錄四年正月乃定今并書然劉綜奏請時已有節名矣

合龍騎十二指揮為六

邊臣言契丹為黑水所侵而遣其部下防境上謂黑

水為惡弱國土

契丹東北控黑水靺鞨西抵夏國此武經地里所云當考

癸亥詔環州緣邊寨兵自今兩月一給緡錢為薪蒸之

費三班借職監汾州靈石縣礮務邊守信坐赴本縣

令飲席大理定杖一百私罪上以其情輕可憫特改為

公罪因詔自今如此類者具罪款刑名奏裁

乙丑上封者言雜買務與內東門司出納因緣為奸上曰此二司屢曾制置嘗給錢五百萬於本司以備支遣不欲稽留價直也先帝時給錢百萬命宋思恭檢校凡宮中市物令即時面給其直用訖復增常滿其數仍聞思恭亦不能盡副先旨近日宮中凡所須索並赴左藏庫雖動須變轉且免擾民耳

太平興國四年末至道元年正月事可參考宋思恭

初見咸平二年九月恐此別一人

丙寅召宰相至龍圖閣觀道像又觀崇和殿瑞物凡四百餘種王旦曰祖宗以來瑞應叢集四方無不傳聞今獲親覩實為神異上曰國家符命彰灼蓋祖宗積德所致至於寰海混同干戈不用成封禪之禮有由然也朕每念前代雖有德之君能行封禪者蓋寡朕乃克行此蓋由雍熙中嘗有經度制度已備朕何力之有旦曰非陛下勵精善繼力致太平則不能奉承先志今又歸美祖宗實宗社無疆之休也 三司請令太府寺造一斤

及五百斤秤以便民用從之始令商稅院於太府寺
請斗秤升尺出賣鎮定部署司言軍士賭博其民家
停留及知情者望悉決配上曰部署司第當約束軍伍
民家停留乃府縣之職也不許是日以昭應宮興工
宴丁謂已下仍賜役卒緡錢

丁卯宴廣平公德彛等及侍教時大雅於北宅以講書
終篇也仍賜大雅綵五十疋皇姪等皆詣便坐占謝上
面戒其勵學

庚午上謂輔臣曰今四方無事累歲豐稔若所在得人則何患俗不康阜哉朕孜孜求賢猶慮在下位者思有以庇民報國而朕不能亟知且峻用之既久不為朝廷所知因亦情志卿等有聞當即啟白苟得其人則國之利也

辛未詔南宮北宅公主郡縣主諸朔望入謁節辰進奉及非時入內其朝班未退並令於玄武門出入俟班退聽由諸門時皇城司言隋國長公主肩輿至右掖門與

朝騎雜入故條約之

陝西旱歉壬申遣鹽鐵判官太常博士楊可馳驛往疏
決繫囚減流罪已下一等死罪情可憫者上請

乙亥林特劉承珪李溥上編成茶法條貫二十三冊
祠部員外郎直集賢院楊侃請令諸州屬縣無遺胥吏
下鄉追事從之侃錢塘人虞卿之後也

丙子廣南西路轉運使何亮言欽州蠻人劫海口蠻戶
禾米如洪寨主李文著以輕兵泛小舟掩襲之文著中

流矢死其隨文著將校八人並斬訖仍牒安南捕賊詔督之明年執狻獠十三人以獻

丁丑禮部貢院言准詔議定國子監兩京諸路五次解到舉人內取一歲最多者為數自今解十之三永為定式詔於五年最多數中特解十之五

戊寅上御便殿慮囚多所原減民有戶絕而妻孥產適他族者至是事發而估錢已費用有司議準法產業當沒官上令以產業給見主納估錢支與存者

庚辰遣右諫議大夫陳象輿等詣陝西祈太平宮后土
西嶽河瀆諸祠旱故也

辛巳詔西京出廩粟賤糶以惠貧民

壬午何亮言交州每移牒緣邊州軍皆俟奏報及申轉
運使往復稽緩致失事機望自今令逐處詳酌行訖以
聞從之 詔諸州奏獄空須司理州院倚郭縣俱無囚
繫方為獄空每奏到刑部將旬奏禁狀一處點對如應
得元敕特降詔獎諭

六月乙酉頒幕職州縣官招輯戶口賞條 詔諸路提
點刑獄無得擅修廨舍

丙戌叙顯雲等州衙內指揮使舒寶舒富向由等來貢
戊子趙德明落起復 令韶州糶廩粟以濟貧民

己丑詔去歲是日天書降泰山在京及諸路並賜休假
一日自今準此後為天貺節

庚寅以左龍武將軍駙馬都尉李遵勗領澄州刺史初
隋國長公主下降賜第永寧里所居堂有龍甌為鳳形

者遵勗悉命饒去主服有虬龍之文亦屏蔽之上歎喜
顧待尤異於是遵勗以疾在告上謂王旦等曰朕遣人
視遵勗疾狀言亦可憂也且柴宗慶歷環衛不久為刺
史遵勗宜循例可校其日月以聞旦等言宗慶授將軍
始七月遇郊祀恩遂領郡遵勗未遇恩然亦七月矣故
有是命 文思使萬州刺史閻日新起胥吏好云為以
進取嘗上言羣臣子弟以廢得官往往未童齒已受俸
望自今年二十以上乃給廩又京城百官早朝而學士

丞郎舍人以上導從呵止太盛難於趨避望令裁損又
屢請對言時務自陳筋力尚壯願正授郡秩効用邊城
乃命為坊州刺史知渭州兼涇原路鈐轄

辛卯知保州趙彬請增屯田務兵五百人從之

東封歲獻文者甚衆命近臣考第得草澤許申進士祖
高洪矩令兩制試所業差第以聞壬辰賜申進士及第
矩同出身面賜袍笏高以父吉坐贓伏法補三班奉職
召河北河東陝西諸路部署司祇應翰林天文歸闕

以邊防無事故也 環慶路鈐轄司言捕得蕃部謀者

魯威法當處死詔械送夏州令趙德明裁遣

甲午幸昭應宮賜修宮使器幣

乙未詔如聞京城多有無賴輩妄稱稟命偵察諸司宜
令三班捕而懲之 詔西北諸路駐泊司事並與知州
同管勾以事多違戾故也 令磁州出廩粟賑貧民

丙申詔自今凡有營造並先定地圖然後興功不得隨
時改革若事有不便須改作者並奏裁先是遣使修吳

國長公主院使人互執所見屢有改易故勞費頗甚上聞之令劾罪而約束焉

丁酉詔修昭應宮役夫三伏日執土作者悉罷之自餘工徒如天氣稍涼不須停作時修宮使丁謂欲宮速成請三伏不賜休假王旦言當順時令上曰理固然乃降是詔西染院使謝德權初預修宮德權患其勞役過甚日與同職忿爭不能制遂求罷知制誥王曾上疏曰臣伏聞朝廷設諫諍之官防政治之闕非其官而言者

皆表其忠况當不諱之朝復忝非常之遇苟進思之無
補懼竊祿以貽譏臣伏覩國家誕受殊祥荐膺祕錄祚
洪圖於萬葉超盛烈於百王陛下寅畏寶符陟封名嶽
功垂不朽澤浸無垠奉若之心斯為至矣而清衷濬發
成命亟行就嚴城之北隅啟列真之秘宇式昭丕應特
建嘉名自經始以來庀徒斯廣輦他山之石相屬於道
途伐豫章之材遠周於林麓累土陶甃揮鍤運斤功極
彌年費將鉅萬掩祈年之舊制踰燦日之前聞命貴近

以董臨假使權而領護如此則國家尊奉靈文之意不為不厚矣崇飾臺觀之規不為不壯矣然而臣之愚懇或異於斯既有見聞安敢緘默臣以為今之興作有不便之事五焉雖鳩僦已行未可悉罷苟或萬一采芻蕘之說省其工用抑其制度亦及民之大惠而憂國之遠圖也所謂五者之目請為陛下陳之且今來所創立宮規制宏大凡用材木莫非梗楠竊聞天下出產之處收市至多般運赴宮尤傷人力雖云只役軍匠寧免煩擾

平民况復軍人亦是黎庶此未便之事一也邇者方畢封崇頗煩經費今茲興造尤耗資財雖府庫之中貨實山積畚築之下工徒子來然而內帑則積代之蓄藏百物盡生民之膏血散之恐易斂之維艱雖極豐盈猶宜重惜此未便之事二也夫聖人貴於謀始智者察於未形禍起隱微危生安逸今雙闕之下萬衆畢臻暑氣方隆作勞斯甚所役諸雜兵士多是不逞小民其或鼠竄郊鄆狗偷都市有一於此足貽聖憂此未便之事三也

王者撫御寰區順承天地舉動必遵於時令裁成不失於物宜靡崇奢侈之風罔悖陰陽之序臣謹按孟夏無發大衆無起土工無伐大樹今肇基卜築衝冒鬱蒸俶擾厚坤乖違前訓矧復旱暵卒瘁雷電迅風拔木飄瓦溫沴之氣比屋罹災得非失承天地之明效歟此未便之事四也臣竊聆中間符命之文有清淨育民之誠今所修宮閣蓋本靈篇而乃過興剗楹之功廣務雕鏤之巧雖屢殫於物力恐未協於天心此未便之事五也伏

望陛下思祖宗之大猷察聖賢之深戒遷思回慮懲往
念來詔將作之官息勤勞之衆輯寧羣品對越高穹如
此則遐邇宅心神祇快望必若光昭大瑞須建靈宮則
臣敢効愚計亦可必行但能損彼規模減其用度止敦
樸素無取瑰竒惟將之以誠明仍重之以嚴潔名數之
際加等是宜實費之資節儉為要俾四海之內知陛下
愛重民力之意豈不美歟昔太宗皇帝建太一上清等
宮亦不使窮極壯麗臣謂陛下宜遵而行之取為法制

以示不敢踰即鳴謙大德光於千古矣柰何特欲過先
帝之制作乎并覩西京造太宗影殿東嶽置會真之宮
計其工傭亦皆不啻中人百家之產然於尊祖禮神則
盛矣其於邦國大計則猶未足為當時之急務也臣料
陛下必為海內承平邊隅清宴人康俗阜時和歲豐縱
或築宮無損於事則臣復謂其不然也方今疆場甫定
邊陲有姑息之虞民俗苟完倉箱無紅腐之積况關輔
之地流亡素多近甸之民農桑失望雖令有司安慰亦

恐未復田廬秋冬之間饑歉是懼亟經營於神館慮稍鬱於輿情且往古廢興之端前王得失之事布在方策足為殷鑒者陛下覽之詳矣非假愚臣一二言焉試觀自昔人君崇尚土木孰若清靜無為者之安全乎願陛下留神垂聽無忽臣言則天下幸甚今雖上下之人皆知事理如此而人人自愛莫敢輕瀆冕旒至於左右大臣則慮計之不從致見踈之悔中外百執則慮言之難達招妄動之尤使忠謹之謀未行良為此也惟臣出自

幽介遭遇文明特受聖知度越流輩官為侍從身服簪
裳粗識安危之機未申補報之效捐軀思奮今也其時
又安敢循默苟容不為陛下別白而論之乎是以輒率
妄庸輕冒宸嚴感發於中無所顧避陛下寬其鼎鑊之
罪矜其螻蟻之誠深鑒古先試垂採擇無謂創一靈宮
為一細事而弗恤也臣以為興役動眾尤繫事機不可
不察也當使鄉校之中豪姦之黨無所開竊議之口則
微臣之望也天下之幸也

王曾疏在言行錄不得月日
附見此當考曾疏有云功極

彌年恐合附來年五月疏又云旱暵案今年五月庚辰
遣官祈雨來年五月辛丑京師大雨然則附今年五月
為
九 除舒州宿松等縣官莊長生牛 禁皇親募工造

侈靡服物

戊戌麟府鈴轄言都克沁族依唐龍鎮為援多擾別部欲
令府州出騎兵襲之上曰蕃部亦吾民也以道撫之彼
必從命不許 詔羣臣上殿劄子自今為二本進內可
行者一留中一付有司否者俱留不報

庚子侍御史趙湘自昇州回上言知洪州馬景病不任

事轉運使劉焯性柔緩本部數州踰歲未嘗巡按都監
張明用刑失中居多博戲詔選官代景洎焯徙明釐務
興州刺史知府州折惟昌率所部威尼族大首領明
葉等四十七人來朝貢名馬命中使館伴上親加勞問
宴賜恩澤甚厚惟昌言先臣御卿蒙賜旗三十竿以壯
戎容請別給賜許之及還又賜內府物遣中使宴餞
辛丑詔金吾街司從人自今無得假借從閭日新之言
也 雍州言蟲食苗尋即自死

上自景德四年以來不復出獵壬寅詔五方鷹鷂量留
十數以備諸王從時展禮餘悉縱之 罷邕宜州歲貢

藥箭

癸卯除昇州竹木稅 詔文武官自今非公事不得入
京百司諸公署如監臨官挈家屬止解舍者許親故來
往無得妨其公事

丙午增饒池二州鑄錢監犒工匠緡錢饒州歲十七萬
池州三十萬

丁未詔倉場役兵並給假休息仍賜緡錢

己酉詔中外章疏無得連用太宗藩邸舊諱二字

先是工部侍郎張秉知制誥周起以所試服勤詞學經
明行修合格人名聞詔工部侍郎馮起給事中薛映龍
圖閣待制戚綸陳彭年鏢宿於秘閣覆考定之庚戌上
御崇政殿親試仍別錄本考較取玉篇中字為號始令
第進士程試為五等曰上次曰中上曰中次曰下上曰
次取考官覆考官所定試卷參較等第有不同者命再

考之考訖又付右僕射張齊賢等詳審仍以高第十卷
付宰相重定賜進士梁固等二十六人及第同出身者
三人同三禮出身者二人九經五經三禮學究明法及
第者四十八人同出身者六人第五人以上除官同元
年榜餘為試銜知縣判司簿尉固顯之子也初以顯遺
蔭進士出身服除詣登聞讓前命願赴鄉貢許之

詔昭應宮初相地止盡內殿直班院丁謂等請增行之
凡東西三百一十步南北四百三十步多黑土疏惡乃

於東京城北取良土易之自三尺至一丈有六等日役
工數萬上以道里稍遠憫其負擔之勞令謂等規畫有
言載以橐駝驢車有言自新城北壕舟運由廣濟河入
舊城可直抵宮門者謂等請用車載為便上曰挽舟止
役千人校之負畚省十倍之力而土可速致用舟為便
也壬子詔三司以空船給昭應宮運土仍浚治渠道
增給諸州採木駕棧軍士裝錢口糧并賜衣服商賈入
官木在路稅筭悉蠲免之官收市者即時給直無得抑

配違者令發運司糾舉以聞 詔廣南福建路諸州軍
禁軍軍使已下犯罪徒已下禁繫奏裁杖已下具犯由
申本路提點刑獄司委詳所犯准法決罪雖杖罪而情
重者亦具款以聞先是刑部郎中楊覃言軍校戍外州
犯罪不至死者望令所在斷遣法寺議如所請上曰戍
兵頗有上軍若諸校獲罪而州郡裁之非便也故差定
此制焉 上謂知樞密院王欽若等曰河北教閱強壯
自北鄙罷兵之後尋令逐州並依常於農閑時教閱蓋

不忘兵戰而使其習以為常若絕而復行契丹必生疑慮昨日見趙州奏稱准宣命教閱可密諭此意及詰其不奉詔之由

